

**BRČKO DISTRIKT BiH  
PRAVOSUDNA KOMISIJA  
BRČKO DISTRIKTA BiH**

**P R A V I L N I K  
O ODREĐIVANJU PREKOBROJNOSTI**

**oktobar, 2014. godine**

Na osnovu člana 114. stav 2. Zakona o službenicima i namještenicima u Pravosuđu Brčko distrikta BiH („Službeni glasnik Brčko distrikta BiH“ broj: 36/07, 2/08 i 06/13) i člana 14. stav 1. tačka n) Zakona o Pravosudnoj komisiji Brčko distrikta BiH („Službeni glasnik Brčko distrikta BiH broj: 19/07, 20/07 i 2/08), Pravosudna komisija Brčko distrikta BiH na 158. sjednici održanoj dana 27.10.2014. godine, *donosi*

## **P R A V I L N I K**

### **o određivanju prekobrojnosti**

#### **DIO PRVI - OPŠTE ODREDBE**

##### **Član 1** **(Predmet)**

Ovim Pravilnikom utvrđuju se kriterijumi, način i postupak utvrđivanja prekobrojnih službenika odnosno namještenika za čijim radom je potpuno ili djelimično prestala potreba u Pravosudnim institucijama Brčko distrikta BiH (u daljem tekstu: Pravosudne institucije), a na osnovu posljedica reorganizacije, smanjenog obima poslova ili ukidanja pojedinih radnih mjesta.

##### **Član 2** **(Cilj)**

Do smanjenja broja potrebnih službenika odnosno namještenika i ostalih zaposlenih u Pravosudnim institucijama, odnosno do proglašenja prekobrojnim dolazi zbog reformskih procesa, reorganizacije, smanjenja obima poslova ili zbog ukidanja pojedinih radnih mjesta.

##### **Član 3** **(Prekobrojnost)**

Prekobrojnim biće proglašen onaj službenik odnosno namještenik koji, na osnovu bodovanja elemenata svih pojedinačnih kriterijuma, utvrđenih ovim Pravilnikom ostvari najmanji broj bodova.

## DIO DRUGI - KRITERIJUMI ZA UTVRĐIVANJE PREKOBROJNOSTI

### Član 4 (Kriterijumi prekobrojnosti)

Prekobrojni službenik odnosno namještenik se utvrđuje na osnovu sljedećih kriterijuma:

- a) godina radnog staža;
- b) zdravstvenog stanja ;
- c) stepena stručne spreme;
- d) ranijeg proglašenja prekobrojnim (tehnoškim viškom);
- e) socijalnog statusa.

### Član 5 (Radni staž)

Po osnovu radnog staža službeniku odnosno namješteniku pripada sljedeći broj bodova:

- a) za jednu godinu radnog staža u pravosudnim institucijama.....šest bodova;
- b) za jednu godinu radnog staža ostvarenog na drugim poslovima, van institucija pravosuđa.....dva boda.

### Član 6 (Zdravstveno stanje)

Po osnovu zdravstvenog stanja službeniku odnosno namješteniku pripada sljedeći broj bodova:

- a) invalidnost I i II kategorije..... 12 bodova;
- b) invalidnost III kategorije..... deset bodova;
- c) invalidnost IV kategorije..... osam bodova;
- d) invalidnost V kategorije..... šest bodova;
- e) invalidnost VI kategorije..... četiri boda;
- f) invalidnost VII kategorije..... tri boda;
- g) invalidnost VIII kategorije..... dva boda.

### Član 7 (Stručna sprema)

(1) Po osnovu stručne spreme koja je utvrđena Pravilnikom o sistematizaciji radnih mjesta na koje je službenik odnosno namještenik raspoređen pripada mu sljedeći broj bodova:

- a) za visoku stručnu spremu-VII stepen..... 12 bodova;
- b) za višu stručnu spremu-VI stepen..... deset bodova;
- c) za VKV-V stepen i specijalista..... osam bodova;

- d) za srednju stručnu spremu- IV stepen..... šest bodova;
- e) za III stepen ..... pet bodova;
- f) nekvalifikovani ..... četiri boda.

(2) Ako službenik odnosno namještenik koji se boduje ima viši stepen stručne spreme od one koja je predviđena Pravilnikom o sistematizaciji radnih mjesta u Pravosudnoj instituciji, priznaje mu se i boduje stručna sprema za radno mjesto na koje je raspoređen.

### **Član 8 (Ranija prekobrojnost)**

Službenik odnosno namještenik koji je ranije proglašen prekobrojnim (tehnološkim viškom) po tom osnovu, ostvaruje bodove i to:

- a) službenik i namještenik u pravosudnim institucijama ..... šest bodova
- b) službenik i namještenik, van pravosudnih institucija..... tri boda

### **Član 9 (Socijalni status)**

Po osnovu socijalnog statusa službenik odnosno namještenik ostvaruje slijedeći broj bodova:

- a) ako izdržava lice sa smetnjama u psiho-fizičkom razvoju..... 12 bodova;
- b) ako je samohrani roditelj ili staratelj ..... deset bodova;
- c) ako sam izdržava članove uže porodice (uža porodica na osnovu Porodičnog zakona Brčko distrikta BiH):

- 1. porodica sa 2 člana ..... dva boda;
- 2. porodica sa 3 člana ..... tri boda;
- 3. porodica sa 4 člana ..... četiri boda;
- 4. porodica sa 5 članova ..... pet bodova;
- 5. porodica sa 6 članova ..... šest bodova.

## **DIO TREĆI - NAČIN ODREĐIVANJA PREKOBROJNOSTI**

### **Član 10 (Odbor za određivanje prekobrojnosti)**

(1) Bodovanje službenika odnosno namještenika na osnovu kriterijuma utvrđenih ovim Pravilnikom vrši Odbor za određivanje prekobrojnosti (u daljem tekstu: Odbor).

(2) Odbor iz stava 1. ovog člana ima tri člana koji su članovi Pravosudne komisije Brčko distrikta BiH (u daljem tekstu: Pravosudna komisija) i koje imenuje Pravosudna komisija.

**Član 11**  
**(Mandat i izuzeće)**

- (1) Mandat Odbora traje dvije godine.
- (2) Ukoliko se pojave okolnosti za izuzeće postupiće se u skladu sa članom 29 i 30 Zakona o upravnom postupku Brčko distrikta BiH, a predlagač iz člana 10. će zamijeniti člana Odbora drugim članom.

**Član 12**  
**(Obaveze Odbora)**

- (1) Odbor vrši prikupljanje podataka po kriterijumima koji se boduju.
- (2) Rezultate bodovanja-Listu sa redoslijedom službenika odnosno namještenika (pregledom broja bodova po osnovu svakog kriterijuma pojedinačno i zbirni broj bodova za svakog radnika) Odbor objavljuje na oglasnoj tabli Pravosudne institucije u roku od 15 dana od dana utvrđivanja liste.

**Član 13**  
**(Proglašenje prekobrojnim)**

- (1) Prekobrojnim se proglašava službenik odnosno namještenik koji nakon bodovanja od strane Odbora ima najmanje bodova.
- (2) Ako dva ili više službenika odnosno namještenika imaju isti broj bodova, prekobrojnim biće proglašen onaj koji je ostvario manji broj bodova po osnovu radnog staža u pravosudnoj instituciji.

**DIO ČETVRTI - ZAŠTITA PRAVA SLUŽBENIKA I NAMJEŠTENIKA**

**Član 14**  
**(Žalba)**

Službenik odnosno namještenik koji smatra da nije pravilno bodovan ima pravo podnijeti žalbu Pravosudnoj komisiji u roku od osam dana od dana dostavljanja rješenja o prekobrojnosti.

**Član 15**  
**(Odluka po žalbi)**

- (1) Pravosudna komisija je obavezna da u roku od 15 dana od dana ulaganja žalbe istu razmotri i donese konačnu odluku.

(2) Odluka Pravosudne komisije je konačna i izvršna.

### **Član 16 (Trajanje prekobrojnosti)**

(1) Prekobrojnost može trajati najduže tri mjeseca uz otkazni rok od 15 dana.

(2) Otkazni rok počinje teći istekom posljednjeg dana prekobrojnosti iz stava (1) ovog člana.

### **Član 17 (Otpremnina)**

Službeniku odnosno namješteniku koji je proglašen prekobrojnim u cijelosti, a kome nije moglo da se obezbijedi radno mjesto u pravosudnoj instituciji na području Brčko distrikta BiH, prestaje radni odnos uz obavezu poslodavca da mu isplati otpremninu u skladu sa odredbama Zakona o platama i naknadama zaposlenih u Pravosuđu Brčko distrikta BiH.

### **Član 18 (Zabrana proglašenja prekobrojnim)**

Poslodavac ne može otkazati ugovor o radu službeniku odnosno namješteniku za čijim je radom prestala potreba usljed ekonomskih, organizacionih i tehnoloških razloga za vrijeme trudnoće, porodijskog odsustva, roditeljskog odsustva i skraćenog rada radi njege djeteta.

## **DIO PETI - PRELAZNE I ZAVRŠNE ODREDBE**

### **Član 19 (Postupak donošenja)**

Pravilnik o proglašenju prekobrojnosti donosi Pravosudna komisija.

### **Član 20 (Primjena propisa)**

Na pitanja vezana za prava službenika i namještenika, koja nisu regulisana ovim Pravilnikom, primjenjuju se odredbe Zakona o radu Brčko distrikta BiH i Zakona o službenicima i namještenicima u Pravosuđu Brčko distrikta BiH.

**Član 21**  
**(Izmjene i dopune Pravilnika)**

Izmjene i dopune Pravilnika vrše se na isti način i po postupku utvrđenom za njegovo donošenje.

**Član 22**  
**(Stupanje na snagu)**

Pravilnik stupa na snagu danom donošenja, a njegovu primjenu prati Pravosudna komisija.

**Predsjednik**  
**Pravosudne komisije**

**Safet Pizović**

**Broj: SuPK – 1439/14**  
**U Brčkom, 27.10.2014.g.**